

全上古三代秦汉
三国六朝文
梁宋齐
第七
函
十
册

全齊文卷十四

烏程嚴可均校輯

褚淵

淵字彥回河南陽翟人晉義興太守爽曾孫尚宋文帝女南郡獻公主拜駙馬都尉除著作佐郎太子舍人太宰參軍太子洗馬祕書丞襲父湛之爵都鄉侯歷中書郎司徒右長史吏部郎明帝卽位遷侍中轉吏部尚書領太子右衛率加驍騎將軍改封雋都縣伯轉侍中領右衛將軍遷散騎常侍丹楊尹出爲吳興太守復徵吏部尚書授右僕射受遺詔爲中書令護軍將軍元徽初爲中軍將軍加侍中進爵爲侯授中書監昇明初改號衛將軍開府儀同三司進中書監司空齊受禪遷司徒改封南康郡公尋加尚書令錄尚書事武帝卽位復爲司空領驃騎將軍卒贈太宰諡曰文簡有集十五卷

秋傷賦

雲紛紛而夾轉兮樹菸黃而隕落瞻孤游之流鴻兮觀雲閒之舞鶴景曖曖而向積兮時冉冉而將薄獨悲愁而悽慘兮斂輕裾以

歸幕

初學記三

爲宋順帝禪位齊王詔

惟德動天玉衡所以載序窮神知化億兆所以歸心用能經緯乾坤彌綸宇宙闡揚鴻烈大庇生民晦往明來積化同軌前王踵武世必由之宋德湮微昏毀相襲景和騁悖於前元徽肆虐於後三光再霾七廟將墜璇極委馭含識知泯我文武之祚眇焉如綴靜惟此紊夕惕疚心相國齊王天誕叡聖河嶽炳靈拯傾提危澄氛靜亂匡濟艱難功均造物宏謀霜照祕算雲回旌旆所臨一麾必捷英風所拂無思不偃表裏清夷遐邇寧謐旣而光啟憲章弘宣禮教姦宄之類覩隆威而隔情慕善之儔仰徽猷而增厲道邁於

重華勲超乎文命蕩蕩無得而稱焉是以辨髮左衽之酋款關請
吏木衣卉服之長航海來庭豈惟肅慎獻楷越裳薦翬而已哉故
四隩載宅六府克和川陸効珍禎祥鱗集卿煙玉露旦夕揚藻嘉
樾芝英晷刻呈茂革運斯炳代終彌亮負展握樞允歸明哲固以
獄訟去宋謳歌適齊昔金政旣淪水德締構天之厯數皎焉攸徵
朕雖寡昧闇於大道稽覽隆替爲日已久敢忘列代遺則人神至
願乎便遜位別宮敬禪于齊一依唐虞魏晉故事

褚淵爲
禪詔文

南齊書高帝紀
上案王儉傳云

荅詔稱柳世隆

世隆至性純深哀過乎禮事陛下在危盡忠喪親居憂杖而後起
立人之本二理同極加榮增寵足以厲俗敦風

南齊書柳
世隆傳

奏劾陸澄

宋世左丞苟伯子彈彭城令張道欣等坐界劫累發不禽免道欣

等官中丞王淮不糾亦免官左丞羊玄保彈豫州刺史管義之譙
梁羣盜免義之官中丞傅隆不糾亦免隆官左丞羊玄保又彈兗
州刺史鄭從之濫上布及加課租綿免從之官中丞傅隆不糾免
隆官左丞陸展彈建康令丘珍孫丹陽尹孔山士劫發不禽免珍
孫山士官中丞何勗不糾亦免勗官左丞劉矇彈青州刺史劉道
隆失火燒府庫免道隆官中丞蕭惠開不糾免惠開官左丞徐爰
彈右衛將軍薛安都屬疾不直免安都官中丞張永結免澄謏聞
膚見貽撓後昆上掩皇明下籠朝識請以見事免澄所居官

南齊書陸

澄傳

難王儉喪遇閏議

厭屈之典由所尊奪情故祥縞備制而年月不申今以十一月而
祥從朞可知既計以月數則應數閏以成典若猶含之何以異於
縞制疑者正以祥之當閏月數相縣積分餘閏厯象所弘

通典計
作私

大五百五十
小三十五

月者數閏故有餘月計年者苞含故致盈積稱理從制有何不可

南齊書禮志下
又見通典一百

薦臧榮緒啟

榮緒朱方隱者昔臧質在宋以國戚出牧彭岱引爲行佐非其所
好謝疾求免蓬廬守志漏涇是安灌蔬終老與友關康之沈深典
素追古著書撰晉史十表贊論雖無逸才亦足彌綸一代臣歲時
往京口早與之遇近報其取書始方送出庶得備錄渠閣採異甄

善南齊書臧
榮緒傳

謝賜珮啟

傳詔宣敕賜臣玉珮一具製懋姬嬴寶冠荆越璇瑰鎮曜珩玦凝
華采賁蓬楹響聞繩戶佩服載驚心容交惕

初學記
二十六

遜位啟

臣顧惟凡薄福過災生未能以正情自安遠慙彥輔旣內懷耿介

便覺暑刻難推叨職未久首歲便嬰疾篤爾來沈痼頻經危殆彌
深憂震陛下曲存遲回或謂僉議同異此出於畱慈每過愛欲其
榮臣年四十有八叨忝若此以疾陳遜豈駭聽察總錄之任江左
罕授上鄰亞台升降蓋微今受祿弗辭退紬斯願於臣名器非曰
貶少萬物耳目皎然共見寧足仰延聖慮稍垂矜惜臣若內飾廉
譽外循謙後此則憲書行劾刑綱是肅臣赤誠不能行亦幽明所
不宥區區寸心歸啟以實自吝寸陰實願萬倍堯世昔王弘固請
乃於司徒爲衛將軍宋氏行之不疑當時物無異議以臣方之曾
何足說伏願恢闡宏猷賜開亭造則臣死之日猶生之年

南齊書
褚淵傳

荅蕭領軍書

來告穎亮敬挹無已謙貶居心深承非飾此誠此旨久著言外況
復造席舒衿迂翰緒意推情顧已信足書紳但今之所宜商推必
以輕重相推世惟多難事屬雕弊四維恒擾邊氓未安國家費廣

府藏須備北狄侵邊憂虞交切寓內含識尙爲天下危心相與共
荷任寄若此當可稍修廉退不求之懷抱實謂不可了其不可理
無固執且勅寇窮凶勢過原燎燬逆倉卒終古未聞常時懼惑當
慮先定結壘新亭枕戈待敵斷決之策實有由然鋒鏑初交元惡
送首總律制奇判於此舉裂邑萬戶登爵槐鼎亦何足少酬勲勞
粗塞物聽今以近侍禁旅進昇中候乘平隨牒取此非叨濟河昔
所履牧鎮軍秩不逾本詳校階序愧在未優就加沖損特虧朝制
奉職數載同舟無幾劉領軍峻節霜明臨危不顧音迹未晞奄成
今古迷途失偶慟不及悲戎謨內寄恆務倍急秉操辭榮將復誰
委誠惟軍柄所期自增茂圭社誓貫朝廷匹夫里語尙欲信厚君
令必行逡巡何路凡位居物首功在眾先進退之宜當與眾共苟
殉獨善何以處物受不自私彌見至公表裏詳究無而後可想體
殊常深思然納

南齊書褚淵傳元徽二年太祖既平桂陽遷中領軍領南兖州增戶邑太祖固讓與淵及衛軍袁粲

書淵
祭答

荅何昌寓書

追風古人良以嘉歎但事既昭晦理有逆從建平初阻元徽未悖
專欲委咎阮楊彌所致疑於時正亦謬參此機若審如高論其愧

特深

南齊書何
昌寓傳

張沖

沖字思約吳郡吳人宋南兖州刺史永從兄子元嘉中辟州主
簿除盱眙太守歷尚書駕部郎桂陽王征南中兵振威將軍征
西從事中郎通直郎武陵王北中郎直兵參軍長水校尉寧朔
將軍左軍將軍加輔國將軍出爲馬頭太守徙盱眙太守永明
中遷西陽王冠軍司馬領節青冀二州刺史鬱林卽位進號冠
軍將軍明帝卽位加征虜將軍徙南梁郡太守除江夏王前軍
長史東昏卽位出爲建安王征虜長史江夏內史行郢州事歷

持節南兗州司州郢州刺史進征虜將軍封定襄侯永元三年
距梁武于郢城病卒贈散騎常侍護軍將軍

乞斷穀啟

淮北頻歲不熟今秋始稔此境鄰接戎寇彌須沃實乞權斷穀過

淮南

南史四十二
崔思祖傳

報鄧元起書

足下在彼吾在此表裏之勢所謂金城湯池一旦捨去則荆棘生

焉

梁書鄧
元起傳

明僧紹

僧紹字休烈一字承烈平原高人宋元嘉中再舉秀才永光中
鎮北府辟功曹泰始末徵通直郎昇明中徵記室參軍齊受禪
徵正員外郎永明初徵國子博士並不就

正二教論

道士有爲夷夏論
者故作此以正之

及聞殊論銳言置家有懼誣聖將明其歸故先詳正所證二經之句庶可兩悟幽津

論稱道經云老子入關之於天竺維衛國國王夫人名曰清妙老子因其晝寢乘日之精入清妙口中後年四月八日夜半時剖右腋而生墮地卽行七步舉手指天曰天上天下唯我爲尊三界皆苦何可樂者於是佛道興焉

事在玄妙內篇是漢中真典非穿鑿之書

正曰道家之旨

具在老氏二經敷立之妙備乎莊生七章而得一盡靈無間形變之奇彭殤均壽未覩無死之唱故恬其天和者不務變常安時處順夫何取長生若乘日之精入口剖腋牟事不符託異合說稱非其有誕議神化秦漢之妄妖延魏晉言不經聖何云真典乎

論稱佛經云釋迦成佛已有塵劫之數或爲儒林之宗國師道士

此皆成實正經非方便之說也

正曰佛經之宗根明極教而三世無得俗證覺道

非可事顯然精深所會定慧有徵於內緣感所應因果無妄於外

夫釋迦發窮源之真唱以明神道之所通也故其練精研照非養正之功微善階極異殆庶自崖道濟在忘形而所貴非全生生生不貴存存何功忘功而功著寂滅而道常出乎無始入乎無終靡應非身塵刼非遐此其所以爲教也

論曰二經之旨若合符契正曰夫佛開三世故圓應無窮老止生形則教極澆淳所以在形之教不議殊生圓應之化爰盡物類是周孔老莊誠帝王之師而非前說之證旣關塞異教又違符合之驗矣

論曰道則佛也佛則道也正曰旣教有方圓豈覩其同夫由佛者固可以權老學老者安取同佛苟挾競慕高撰會雜妄欲因其同樹邪去正是乃學非其學自漏道蠹祇多不量見恥守器矣
論曰其人不同其爲必異各成其性不易其事又曰或昭五典或布三乘教在華而華言化夷而夷語又曰佛道齊乎達化而有夷

夏之別正曰寂感遂通在物必暢佛以一音隨類受悟在夷之化豈必三乘教華之道何拘五教沖用因感既夷華未殊而俗之所異孰乖聖則雖其人不同然其教自均也

論曰端委摺紳諸華之容也翦髮緇衣羣夷之服也正曰將求理之所貴宜無本禮俗沿襲異道唯其時物故君子豹變民文先革顓孫膺訓喪志學殷夫致德韶武則禪代異典後聖有作豈限夷華況由之極教必拘國服哉是以繫其恆方而迷深動躓矣水陸既變致遠有節舟車之譬得無翩乎而刻船守株固以兩見所歸論曰下棄妻孥上廢宗祀嗜欲之物咸以禮伸孝敬三典獨以法屈悖德犯順曾莫之覺又曰全形守祀繼善之教也毀貌易性絕惡之學也理之可貴者道事之可賤者俗正曰今以廢宗祀爲犯順存嗜欲以申禮則是孝敬三典在我爲得俗無必賤矣毀貌絕惡自彼爲鄙道無必貴矣愛俗拘奮崇華尚禮貴賤迭置義成獨

說徒欲蠹粥於凡觀豈期本理於聖言邪

論曰泥洹仙化各是一術佛號正真道稱正一一歸無死真會無生正曰侯王得一而天下貞莫議仙化死而不亡者壽不論無死臆說誣濫辭非而澤大道既隱小成互起誠哉是言其諸誣詭謗慢欲以苟濟其違求之聖言固不容譏矣今之道家所教唯以長生爲宗不死爲主其練映金丹餐霞餌玉靈升羽蛻尸解形化是其託術驗而竟無覩其然也又稱其不登仙死則爲鬼或召補天曹隨其本福雖大乖老莊立言本理然猶可無違世教損欲趣善乘化任往忘生生存存之旨實理歸於妄而未爲亂常也至若張葛之徒又皆離以神變化俗怪誕惑世符呪章劾咸託老君所傳而隨稍增廣遂復遠引佛教證成其僞立言舛雜師學無依攷之典義不然可知將令真妄渾流希悟者永惑莫之能辯誣亂已甚矣

客既悉於佛老之正猶未值其津今將更麤言其隅而使自反焉
夫理照研心二教兩得乃可動靜兼盡所遇斯乘也老子之教蓋
修身治國絕棄貴尚事止其分虛無爲本柔弱爲用內視反聽深
根寧極渾思天元恬高人世浩氣養和失得無變窮不謀通致命
而族達不謀己以公爲度此學者之所以詢仰餘流而其道若存
者也安取乎神化無方濟世不死哉其在調霞羽蛻精變窮靈此
自繕積前成生甄異氣故雖記奇之者有之而言理者弗由矣稽
之神功爰及物類大若麟鳳怪瑞小則雀雉之化夫旣一受其形
而希學可致乎至乃顏孔道鄰親貲納之極固將仰靈塵而止欲
從未由則分命之不妥有推之可明矣故仲尼貴知命而必有所
不言伯陽去奇尚而固守以無爲皆將以抑其誕妄之所自來也
然則窮神盡教固由之有宗矣道成事得各會之有元矣夫行業
著於前生而強學以求致其功積習成於素辱而橫暴以妄易其

爲首燕求越其希至何由哉故學得所學而學以成也爲其可爲而爲可致也則夫學鏡生靈中天設教觀象測變存而不論經世之深孔老之極也爲於未有盡照窮緣殊生共理練僞歸真神功之正佛教之弘也是乃佛明其宗老全其生守生者蔽明宗者通然靜止大方乃雖蔽而非妄動由其宗則理通而照極故必德貴天全自求其道崇本貲通功歸四大不謀非然守教保常孔老之純得所學也超宗極覽尋流討源以有生爲塵毒故息敬於君親不敬議其化異不執方而駭奇妙寂觀以祐思功積見而要來則佛教之粹明於爲也故夫學得所學則可以貲全生靈而教尊域中矣明爲於爲將乃滅習反流而邈天人矣過此已往未之或知洗慮之得其將在茲

弘明集六又略見齊書
顧歡傳南史顧歡傳

檀超

超字悅祖高平金鄉人元嘉中爲州西曹孝建中爲宣威府參

軍還直東宮除驃騎參軍寧蠻主簿鎮北諮議轉尚書度支郎
車騎功曹桂陽內史入爲殿中郎兼中書郎零陵內史征北驃
騎記室國子博士兼左丞入齊遷驍騎將軍常侍司徒右長史
上表立國史條例

開元紀號不取宋年封爵各詳本傳無假年表立十志律厯禮樂
天文五行郊祀刑法藝文依班固朝會輿服依蔡邕司馬彪州郡
依徐爰百官依范曄合州郡班固五星載天文日蝕載五行改日
蝕入天文志以建元爲始帝女體自皇宗立傳以備甥舅之重又
立處士列女傳

南齊書檀超傳建元二年初置史官以超
與驃騎記室江淹掌史職上表立條例

沈淵

淵字口口吳興武康人宋侍中懷文第二子永明中爲吏部郎
與兄淡弟冲俱歷御史中丞司直

薦沈麟士表

大五百二十五
小四十八